

«Per nus èsi ina gronda onur»

Cussegl grond: Sessiun extra muros ad Arosa

DA GION NUTEGN STGIER / ANR

■ **En il center da la sessiun ordaifer Cuira è natiralmain per il cussegl grond la lavur parlamentara, malgrà il program accompagnant e l'inscunter cun la populaziun. Tranter auter stat sin la glista da tractandas il quint dal chantun 2014.**

Dapi Mustér, Tavau, Landquart, Puschlav e Samignun è Arosa, dal mez zercladur, per quatter dis lieu da la sessiun extra muros dal parlament grischun. Las emprimas trais giadas sajan deputadas e deputads stads l'onn 1992/93 ordaifer Cuira per salvar lur sessiun e quai per via da la renovaziun da la sala parlamentara a Cuira, ha ditg *Duri Campell*, il president dal cussegl grond. Sin iniziativa da l'anteriura deputada *Barla Cabannes* saja il 2007 la sessiun champestra danovamain daventada in tema e lura puspè vegnida introducida. L'interess dad esser lieu ospitant da la sessiun extra muros saja fitg grond, uschia hajan il 2009, quel onn ch'il parlament saja stà al Puschlav, anc tshintg ulteriuras vischnancas già interess d'organisar quella occurrenza politica. L'onn 2012 è il parlament chantunal s'inscuntrà a Samignun ed er per quella sessiun ordaifer Cuira avevan anc quatter ulteriurs lieus demussà interess. Usa en 10 dis vegn Arosa a retschaiver deputadas e deputads, la regenza grischuna ed in bel dumber schurnalists. Ina sessiun champestra saja ina buna plattafurma per s'avischinar a la popu-



Il cussegl grond s'incuntra proximamain ad Arosa per la sessiun extra muros e dasper la lavur parlamentara stat er ina excursiun sin il «Weisshorn» sin il program.

FOTO AROSA TURISSEM/N. MATTLI

laziun e betg il davos er ina buna occasiun per deputadas e deputads da s'enconuscher pli bain, cun be paucs ir la saira a chasa durant la sessiun extra muros, ha ditg *Duri Campell*.

Festa publica per vegl e giuven

Sa mussà ventiraivel tar la conferenza da pressa ier a Cuira è cunzunt *Lorenzo Schmid*, il president communal d'Arosa. «Per nus èsi ina gronda onur

dad esser ospitants dal parlament grischun, gea schizunt ina onur ed er in vair cletg», ha ditg il president dal lieu turistic en il Scanvetg. Las deputadas ed ils deputads duaian survegnir ad

Arosa la pussaivladad d'emprender ad enconuscher pli bain la regiun e cunzunt er la populaziun, ha manegià *Lorenzo Schmid*. Per quest intent vegnia la vischnanca d'Arosa ad arranschar in program accompagnant interessant e varià. «Nus essan prontos per retschaiver regenza, parlament ed auters giasts», accentuescha *Lorenzo Schmid*. La sala da congress ch'è vegnida transformada en in lieu per il parlament saja bunamain pronta er quai che pertugia l'infrastructura, ha ditg *Domenic Gross*, il manader dal secretariat dal cussegl grond. Ina sessiun en la sala dal cussegl grond a Cuira custa al chantun radund 150 000 francs e per la sessiun extra muros ad Arosa han ins da quintar supplementar cun 130 000 francs.

Betg mo per sa divertir

Las sessiuns ordaifer il bajetg dal cussegl grond servan en emprima lingia a la lavur parlamentara. Tar la sessiun extra muros ad Arosa han deputadas e deputads da s'occupar cun il quint dal chantun 2014 e cun ina revisiun parziala da la lescha chantunala da finanzas. Sin la glista da tractandas stattan er ils rapports da gestiun da las instituziuns autonomas da dretg public dal chantun ed ina revisiun parziala da lescha davart las vias. Plinavant ha lieu l'elecziun dal presidi da la regenza per l'onn 2016. La sesidas dal parlament èn sco adina publicas e las persunas interessadas èn cordialmain envidadas da las perseguitar davent da la tribuna.